




## DV PAYS BAZADOIS.



Le pays Bazadois contient les villes qui ensuyuent, Bazaz capitale, & de laquelle le pays est nommé, & est vn Euesché, apres sont Mont-marfan, Caster, Geloux, Aire Euesché, le Max d'Aire.

Bazaz est située en vne place sablonneuse, & est Euesche le plus ancien de Gascoigne, le terroir est vague.

Ceste ville du costé de Septentrion à vn bon terroir fertile en bleds, vins, fruiets & bestail. Il y a siege de Seneschal en ceste ville.

L'eglise cathedrale est dediee à S. Iean Baptiste, le iour de la feste duquel l'on y fait de grands  
 triom-

triomphes, & auoit on de coutume d'y faire courir vn taureau eschauffé, avec prix à celui qui le pourroit arrester.

---

DE LA VILLE DE  
Dax.

**C**este ville est situee sur la riuere d'Adur, & est forte & en forme carree flanquee, & fossoyee autant que ville de France, ayant les eaux à souhair, & en son enclos des bains chauds gueriffans de plusieurs maladies.

Dax est Episcopale sous l'Archeuesché d'Auchs, & y a aussi siege de Seneschal, auquel ressortent les Landes, le Bayonnois, & la haute Gascoigne.

Ceste ville s'apelloit anciennement la Cité des Nobles, estant

stant gouvernee par douze Seigneurs, auant la reduction de Guyenne. Chacun desquels y auoit vne tour qui portoit le nom de sa famille.

Hors la ville, pres le chasteau S. Panthaleon, est vne fontaine d'eau salee, d'où l'on tire grande quantité de sel tresbeau, mais vn peu corrosif estant allumineux.

Lariuiere de l'Adur passe à Dax, & y est vn fort beau pôt avec vne tour qui porte le nô d'amours, où tous les ans à la S. Iean se font des combats & exercices ioyeux par ceux du país.

Vn quart de lieuë loin de la ville on void vn autre pont, dans lequel sont trois tombeaux lesquels en pleine lune s'ont pleins d'eau, & la lune estant en son decours, il n'y en a vne seule goutte. Ils sont semblables à celui qui est à S. Seuerin.

De

**C**este ville est posee sur le bord del'Ocean Occidental, en l'emboucheure que font les riuieres de l'Adur, & du Gaue dedans les ondes de la mer, & la plus forte du Royaume. Elle est capitale des Biscains & Cantabres subiects au Roy iusqu'au fleuue d'Iron, separant la France d'avec l'Espaigne.

Bayonne est Euesché dependant de l'Archeuesché d'Auchs: En icelle n'entre personne avec les armes, que le Roy & les Princes du sang, ains faut laisser l'espée, & les armes à la porte. Ce qui s'observe de mesme en la forte place du mont S. Michel sur la mer pres Tombelaine, en la basse Normandie, à trois lieues d'Auranches.